

REHABILITĒTS PROF. IZIDORS ANCĀNS

Bazneickungs Izidors Ancāns, cēlīs nu Leivōnu pogosta Mōlakolna, studēja Romā Sv. Gregora koledžā (Collegium Gregorianum), kuru beidze ar doktora gradu Svātajūs Rokstūs.

Beja nūdūmōts, ka jys nūsadorbōs ar Svātūs Rokstu tulkōšonu latvyski. Jys ari tyka izdarejis Jaunōs Dereibas tulkōjumu latgaliski un beja sagatavōjis eksemplaru mašynrokstā dēļ druka. Bet nanūskaidrōtu īmesļu dēļ jō tulkōjums natyka pijemts un archiveiskups uzdeve Svātūs Rokstu tulkōšonu Dr. Aloizijam Brokam, Aglyunas gimnazijas direktoram, kuram nabeja vajadzeigūs volūdas zynōšonu. Dr. Izidors Ancāns tyka nūzeimōts par profesoru Goreigajā seminarā Reigā, bet tur jys ilgu laiku nasabeja, tikai dažus godus. 1933. goda augustā jys tyka pōrcalts uz Aglyunas gimnaziju par inspektoru un greku volūdas skūlōtōju. Bet ari tur jys palyka tikai kaidus pōris godus.

Tod jys tyka pōrcalts uz Ludzu par vikaru pi dekana A. Urbša un ticeibas mōceibas skūlōtōju Ludzas gimnazijā. Pēc tam jys tyka īcalts par Krōslovas gimnazijas direktoru, pasateicūt tam apstōklam, ka jam beja pasazeišona ar īspaideigim luteranim Reigā, kas jū protežēja. Pēc boļševiku īnōk-

šonas 1940. godā jys nu omota tyka atstōdynōts un aizgōja kaidā draudzē par prāvestu. Tod jys tyka nūzeimōts Varakļōnu draudzē. Kod par Varakļōnu dekanu tyka nūzeimōts bazneickungs Dukajskis un Dr. Izidors Ancāns par vikaru, jys lyudze veiskupu A. Urbšu, kas vadeja Līpōjas veiskupiju, pajemt jū sovā diecezē. Veiskups A. Urbšs beja humanōks un taisneigōks un tai beidzūt Dr. I. Ancāns tyka vajā nu intrigom un terora, nu kō jys beja daudzķōrt cītis.

Tod Dr. I. Ancāns pōrsacēle uz Kūrzemi, kur palyka, kod ūtru reizi Latviju okupēja boļševiki 1944. goda rudinī. Zam boļševiku režima jys ir ticis nūtisōts uz 8 godim izsyuteišonā. Pēc atsagrīzšonas nu izsyuteišonas jys dzeivōja Kuldigā un apkolpōja Kuldigas un apkōrtnes latvišu katōļu draudzes. Un pēdeigi vēstulē, kas sajemta nu Latvijas 1967. goda jūlijā, stōv raksteits: „Ar pyrmū augustu Dr. Izidora Ancāna jaunō dorba vīta byus Jelgova, kur jys nūzeimōts par dekanu, bet reizē jys byus ari katōļu Goreigō seminara rektors Reigā. Jelgovā jys byus tikai divi dīnas nedeļā: sastdīņ un svātdīņ, bet pa dorba dīnom dzeivōs Reigā un vadeis Goreigū seminaru. Daudzi par jō īceļšonu šymā omotā ir ļūti sa- jysmynōti un pateiceigi Dīvam par labvēleigu izkōrtōjumu. Lai gon rektoram jau ir 71 gods, jys vēļ ir spērgts gorā un nav zaudējis sova veseleigō humora.”

Tik tōļj citāts nu dzimtinē raksteitōs vēstules. Šū faktu var atzeimēt ar gondarejumu, ka pēc ilgim godim un daudz cīsšonom un pazamōjuma prof. I. Ancāna spējas ir nūvērtātas un jam īrōdeita pīnōceiga vīta.